

COLUMNNA

Turist u terrorist?

CHATRINA JOSTY-KREUZER

«**E**st tü uossa ün turist u ün terrorist?» han chantà «Tabularasa» sin la cumpilaziun rumantscha legendara «revoluziun – grooves rumantschs», edida l'onn 1999.

Dapi lura è capità magari bler sin quest mund e sur dal terrorissem na fan ins nagins skerzs.

Ma la chanzun avess segir era il potenzial da daventar in hit en il Oberland Bernais. Per planisar la «Landschulwoche», che jau hai fatg (stuì far!) cun mia quarta classa, 21 uffants nun-muntagnards cun background da migraziun, sun jau stada gia durant las vacanzas da stad a recognoscar a Kandersteg. Là hai jau fatg l'enconuschientscha da Signur Gerber, il pedel dal «Ferienheim Bergfried», ch'è noss quartier durant il champ.

Esch'el l'enconuschess, lura chantass Signur Gerber la chanzun da «Tabularasa» di e notg. El la chanta gia! Cun ses plets. I saja ina catastrofa cun il turissem a Kandersteg, accentescha el tar mintga inscunter. E durant l'emna dal champ èn quels inscunters fitg frequents. I dat adina insatge da far per Signur



Gerber ed adina insatge per s'agitar. Ils turists parcheschian l'auto dapertut nua ch'i va e na va betg, u ch'els vegnian en roschas cun il tren, stettian en pes (senza mascrina e senza distanza) en il Volg e cumprian davent als indigens anc la davosa servela, u plitost il davos toc tofu, per ir tar il Oeschinensee cun chalzers da gimnastica u sandalettas e rassas curtas e fatschas smincadas e sixpacks per lura far la fotografia perfetga.

Quests influencers, quai saja il pir. Influencer e «tamil tigers» (ses plets) che vegnian cun tastgas da cummissiuns dal Migros. E per vi da quests turists na possa el betg pli ir cun ses bike. Signur Gerber è in da quels bikeists passiuads e pensiunads che blastemman lura magari era si per tut che na va betg ord via. «Ti f. da tgil!» cloma'l cur che jau al

telefonesch per far giu la surdada da la clav. «Hai jau gista ditg f. da tgil? Betg si per vus! Si per quest Ollandais qua che va si per ina via champestra nua che jau vom grad cun velo.»

Gea, Signur Gerber è in caliber tut spezial, ma el na para insaco betg dad esser il sulet a Kandersteg. Ils indigens sa protegian da l'invasiun turistica cun metter si dapertut tavlas cun scumonds da passar e placats scrits cun letras grondas che admoneschan da betg laschar rument e da betg far quai e tschai ed insumma. Kandersteg en alv e cotschen – scumandà, scumandà, scumandà. Turist = terrorist.

Jau hai chapientscha e dun da badar questa a Signur Gerber cun al raquintar da mes trauma d'uffanza pervi dals millis da schlittunzs che passavan d'enviern cun lur schlittas tras la vischnanca da Brauvuogn. E cun quai hai jau enta maun il bun pedel. Ed el daventa, almain cun mai e cun mia classa, paschaivel sco ina nursa. Ina nursa bain protegida encunter il luf. Ma quai è in auter tema. Per il proxim inscunter cun Signur Gerber.

Chatrina Josty-Kreuzer, lavura sco scolasta a Moosseedorf en il chantun Berna.